

60
8. sept.

L Ö G

um

breyting á lögum nr. 61, 14. júní 1929, um einkasölu á síld.

Vér Christian hinn Tíundi, af guðs náð konungur Íslands og Danmerkur,
Vinda og Gauta, hertogi í Slésvík, Holtsetalandi, Stórmæri, Þéttmerski,
Láenberg og Aldinborg,

Gjörum kunnugt: Alþingi hefir fallizt á lög þessi og Vér staðfest þau með samþykki Voru:

1. gr.

2. gr. laganna orðist þannig:

Útflutningsnefnd hefir yfirstjórn á öllum framkvæmdum einkasölnnar. Fimm menn eiga sæti í þeirri nefnd. Skulu fjórir þeirra kosnir á aðalfundi með hlutfallskosningu til eins árs í senn, og jafnmargir varamenn á sama hátt. Atvinnumálaráðherra skipar fimmta manninn og varamann hans til jafnlangs tíma. Allir nefndarmennirnir skulu vera búsettir við Eyjafjörð eða Siglufjörð eða hafa aðsetur þar að minnsta kosti frá miðjum júní til septemberloka. Útflutningsnefnd kys í byrjun hvers starfsárs formann fyrir komandi ári. Fáí enginn nefndarmanna meiri hluta atkvæða (3 af 5), skipar atvinnumálaráðherra formanninn.

2. gr.

Fyrsta málsgrein 3. gr. laganna falli niður. Í hennar stað komi:

Útflutningsnefnd ræður framkvæmdarstjóra, einn eða fleiri, eftir því, er þurfa þykir. Hún ákveður laun þeirra og setur þeim erindisbréf.

3. gr.

3. liður 4. gr. laganna orðist þannig:

Að selja fyrir einkasöluna í samráði við útflutningsnefnd o. s. frv.

4. gr.

11. gr. laganna verður 12. gr., en í stað 11. gr. komi ný 11. gr., svo hljóðandi:

Aðalfundur Sildareinkasölnnar skal haldinn ár hvert á tímabilinu 20.—30. apríl, annaðhvort á Akureyri eða í Reykjavík, og skal útflutningsnefnd boða til fundarins með minnst 8 vikna fyrirvara. Á aðalfundi skulu þessi mál tekin fyrir:

1. Lagðir fram til úrskurðar endurskoðaðir reikningar einkasölnnar fyrir

næsta ár á undan, ásamt athugasemdum endurskoðenda og svörum útflutningsnefndar og framkvæmdarstjóra.

2. Lögð fram skýrsla útflutningsnefndar um reksturinn næsta ár á undan.
3. Kosnir fulltrúar í útflutningsnefnd, einn endurskoðandi og varamaður hans, báðir til eins árs í senn.
4. Ákveðin þóknun útflutningsnefndar og endurskoðenda fyrir næsta ár á undan, og sömuleiðis ferðakostnaður fulltrúa aðalfundar.
5. Önnur mál, er fram kunna að koma og varða hagsmuni einkasölunnar.

Aðalfund sækja 14 kjörnir fulltrúar. Skulu 7 kosnir af þeim útgerðarmönnum, er skip gerðu út á sildveiðar og lögðu inn sild til einkasölunnar næsta ár á undan kosningu, og greiðist eitt atkvæði fyrir hvert skip. 7 skulu kosnir af Alþýðusambandi Íslands, eða Alþýðusambandsstjórninni í þess stað, ef sambandsþing hefir ekki komið saman áður en kosning fer fram. Útgerðarmenn sunnlands kjósa 2 fulltrúa, útgerðarmenn vestanlands 1, útgerðarmenn norðanlands 3 og útgerðarmenn austanlands 1. Fulltrúar Alþýðusambandsins skulu allir kosnir úr hópi sjómanna, og skulu 2 vera af Suðurlandi, 2 af Vesturlandi, 2 af Norðurlandi og 1 af Austurlandi. Fer kosningin að öðru leyti fram eftir þeim reglum, er atvinnumálaráðherra setur. Jafnmargir varamenn skulu kosnir af sömu aðiljum og á sama hátt. Þar, sem kosnir eru fleiri en einn fulltrúi, skal hafa hlutfallskosningu.

Kjörtímabil fulltrúa á aðalfund sé tvö ár.

Til þess að aðalfundur sé lögmætur, þurfa minnst $\frac{2}{3}$ kjörinna fulltrúa að sitja hann. Nú verður aðalfundur ekki lögmætur, og boðar þá útflutningsnefnd til hans á ný með minnst 14 daga fyrirvara, og getur sá fundur úrskurðað sig lögmætan, þó að skorta kunni á næga þátttöku.

5. gr.

Atvinnumálaráðherra skipar annan endurskoðanda einkasölunnar og varamann hans, báða til eins árs.

6. gr.

13. gr. laganna fellur niður.

7. gr.

14. gr. laganna verður 13. gr. og orðist þannig:

Atvinnumálaráðuneytið semur reglugerð um skoðun á sild.

8. gr.

Lög þessi öðlast þegar gildi.

Bráðabirgðaákvæði.

Atvinnumálaráðherra kallar saman aukafund í nóvembermánuði 1931, skipaðan samkv. þessum lögum. Þó skal við kosningu útgerðarmanna til hans miða við skip þau, er gerð voru út á síldveiðar sumarið 1931.

Á þeim fundi skal kosin útflutningsnefnd og endurskoðandi samkvæmt þessum lögum.

Jafnframt skipar atvinnumálaráðherra fimmta manninn í nefndina, endurskoðanda og varamenn þeirra.

Hin nýja útflutningsnefnd og endurskoðendur taka við starfinu í ársbyrjun 1932, og fellur þá jafnframt niður umboð núverandi útflutningsnefndar og endurskoðenda.

Útflutningsnefnd þessi og endurskoðendur gegna starfinu til þess tíma, er útflutningsnefnd og endurskoðendur eru kosnir á fyrsta reglulegum aðalfundi í maí 1932.

Eftir þessu eiga allir hlutaðeigendur sér að hegða.

Gefið á Sorgenfrihöll, 8. september 1931.

Undir Vor konunglega hönd og innsigli.

Christian R.
(L. S.)

Tryggvi Þórhallsson.